

甬上水利志

周道遵攷述

卷六

鄞江

源出四明山自仗錫過大皎出它山堰迤邐東來會大埠頭剡源水同出斗門橋又會奉化金溪龍溪水自方橋出是名三江口東南經北渡狗頸塘翻石渡銅盆浦周宿渡長春塘過郡城之東迤北而慈谿江自西流入焉又名三江口合流東北經白沙梅墟至鎮海入海名

甬上水利志

卷六

一

大浹港

敬止錄

道光二十二年嘆夷滋事紳士議於梅墟

截江為防堵計諸生周道遵赴叅贊行臺上書阻之跨

江有五橋曰東津浮橋元貞橋百梁橋鄞江橋陳婆渡

橋

另詳後  
新增

國朝邑令錢維喬鄞江源流辯案鄞江之正源出於四明山自仗錫過大皎出它山堰過鄞江橋始有鄞江之名又東南過百梁橋元貞橋至方橋而奉化江自東南合焉又東南經北渡九經塘翻石渡銅盆浦周宿渡長春塘過郡城之東迤北而慈谿江自西流入焉所謂三

江口也合流東北注至鎮海而入於海蓋鄞江合奉化江至郡城東始有甬江之名及慈谿江西來同注於鎮海統名甬江矣鄞江奉化江慈谿江各自有源始分而後合齊氏水道提綱謂鄞江有南北二源卽慈谿奉化二江而不知鄞江自有正源一謬也又謂慈谿江與奉化江會於寧波府城西南則奉化之水斷無流向府城西南之理二謬也若云二壩下流爲慈谿江之下流則尤不達於地勢二壩以內之水上承山溪流入於江江水不能入壩也江水通潮古人置碶壩以禦鹹潮使江流不得

溢入齊侍郎生長浙東何乃昧於流之上下三謬也且二壩以上之水係鄞江之別支與奉化江無涉縱使舟楫可通亦須越幾重壩而至豈容指爲交會四謬也其言奉化江分南北二派其北派與慈谿二壩下流會尤屬妄說奉化江至方橋而合於鄞江江之北岸皆有碶閘碶閘以內皆它山之分流交注實鄞江上源之支也內水高江水低其非江水所分明甚五謬也辨水道者當先知地形之高下以浙人叙浙水尙有此失地理豈易言哉

周道遵阻截梅江書近聞愚紳劄議欲塞梅江爲防堵計不知梅江而塞之也害民之弊居其八耗帑之弊居其二所謂害民之弊居其八何也郡南之水源發它山奉水又來會之郡西之水源發紹興餘姚之太平諸山慈水又來會之一逢淫雨溝澮皆放是爲上落水也而皆從梅江入海勢甚洶湧攔腰一截水無去路鄞慈奉近江居民必爲魚鱉其害一潮由大決漲入上虞餘姚慈谿奉化路歷數百里港經數十支攔腰一截潮無進路勢必合數百里數十港日至之潮湧於一處卽非秋

汛而瀾漫撼激鎮關以內居民亦爲魚鱉其害二梅江一名魯猛謂江自大決口至鄞江水道本直注至馬嘴滙成嶽嶽至三官堂始西接鄞江潮流甚猛急也於此截斷必至上衝下激塘塢隄埧兩岸決無可種之田可居之屋矣其害三鄞東自楊木碛以下鎮西自張鑑碛以上江塗斥鹵栽種非宜故其居民皆以燒鹽爲業課登引額梅江一塞潮不內入勢將外湧則鄞之鹽場必成廢地鎮之鹽場必成浮塗其害四餘上慈奉四邑民田雨則藉江洩放旱則藉潮灌溉梅江實要口也塞不

使通鄞慈奉三江將變爲河大旱易竭何以救災其害  
五鄞之東錢湖姚家浦姜茅山與鎮邑西北兩鄉民多  
漁戶每逢漁汛萬艘進出梅江乃必由之路塞之則貨  
當起駁鮮者易餒餒者難銷虧貨折本必令漁戶失業  
白水盜船皆失業之漁戶也其害大甬江馬頭外省商  
船皆泊於此各路客貨皆困於此梅江塞住祇有鎮關  
可通而鎮關狹隘馬頭難立得毋上欠關款而下滯民  
財其害七或曰塞梅江而左開泥衙頭堰右開清水鋪  
堰鄞慈之水仍有去路於民何害然而堰口之狹不敵

江面之寬兩堰雖開若逢大水去將何及而且淡水可  
從此出鹹潮即可從此進餘上慈奉之不受鹹潮以大  
江之遠海也今以近海之小港納之四邑之用必受鹹  
潮不然前人之塞斯兩堰誠何心哉其害八所謂耗帑  
之弊居其二何也舊年釘椿沈船浮銷幾何糜費幾何  
迨夷船一至得其益者又幾何填之以石似乎較勝抑  
知水深江闊施力殊難海潮至此又甚猛急隨填隨壞  
勢所必然即使僥倖成功而上水不能禁其衝下水不  
能禁其激時常修理費用莫定是直以梅江爲漏卮矣

其耗一南岸石塘一遇颶風助浪輒多撞塌此所以每  
年修築也若中流復有阻攔衝撞必烈倒塌必數修築  
之費伊于胡底是又以梅江爲鑠鑪矣其耗二況乎防  
堵郡城非無良策而獨於梅江始釘以椿繼沈以船見  
其無益而復欲以石填之愚紳之創此議果何爲乎將  
爲開銷之地乎抑爲浮冒之地乎試以害民耗帑之弊  
折而止之則黎庶幸甚則 國家幸甚

東津浮橋 一名靈橋俗呼江橋東達東七鄉西入靈  
橋門自唐長慶三年刺史應彪創置凡十六舟互板其

上長五十五丈闊一丈四尺初置東渡門外水駛不克  
成乃徙今地方經始時有虹暎其上因名橋曰靈現又  
曰靈建太和三年刺史李文孺僖昭間刺史黃晟重修  
宋開寶中節度使錢億新之乾道中郡守張津慶元中  
守林大中嘉泰元年守陳杞嘉定四年守程準六年提  
刑攝守程覃十年守趙師岳寶慶三年守胡榘淳祐二  
年守陳塏皆因其壞而重新焉元至元二十八年廉訪  
副使陳祥重置至正二十年江浙省平章方國珍再造  
置田立廨籍夫守僧其法最善迨其末年田與局俱廢

嗣後多簽富民修治而橋政滋害矣明洪武二十七年  
郡人黃公廓建言增設船二隻簽民七十三戶守之正  
統十四年守陸奇重造維以鐵組成化二年守方達更  
置嘉靖間邑令劉宗仁徐易郡守張正和周希哲皆修  
之明季每損壞僉報富戶修造工成獎以冠帶調之江  
橋大戶膺其役者苦之

國朝順治間知府楊之柄從生員聞性道之議始詳請  
每里科銀三兩五年一徵官爲修造康熙二十六年遇  
颶船排飄散知府李煦捐銀千餘兩重造甕船用大小

排方厚板密釘左右設欄楯樞樞枋皆擇巨木以筏纜絞  
縛互相聯絡兩岸統貫鐵鍊復加筏纜中繫橋排旁碇  
岸之四角仍通詳浮橋內外不許泊船衝擊勒石橋畔  
示禁康熙三十年分巡道趙良璧因舊寧波衛地招民  
造屋每間輸稅一錢每年收稅銀一十四兩零由縣徵  
解府庫爲歲修之用康熙四十三年橋西新漲沙塗一  
方居民具呈情愿填築蓋屋四間每年出地稅銀二十  
兩作歲需纜索之用嗣後每歲修葺需費或二三百金  
不等除海關領款銀八十六兩六錢四分外餘於藩庫

動支乾隆三十五年以司庫並無閒款令本縣自行籌辦知縣商皓議令填築甬江塗岸砌礮蓋屋凡一百三十四間半每間輸塗租一千四百文共錢一百八十八千三百文以濟橋工通詳批准自後歲修浮橋皆以關款塗租二項報銷其看守水夫十名每名給工食銀五兩錢纜銀一兩均係鄞縣於地丁項下支銷

參歷志 嘉慶

間兩次募修將原設九排十六舟改爲八排十四舟每遇風潮輒致衝壞道光二年風水大作衝壞尤甚紳士徐桂林吳楠李權等各捐已資稟蒙各憲捐廉協濟再

經縣書史義震王宗堯等分頭勸募得復舊制九排十六舟東西兩坵加高墊船排板加厚自道光四年興工至五年秋一律告竣又恐歲修經費不敷續勸東西兩岸未認之沿江房屋一百八十餘間每間每年納塗租錢一千四百文再於修理浮橋餘塗內建造房屋六間當秋收時歸於公用工畢出租生息每年計得租錢一百二十千文烏豐堰下塗地亦准出租每年計得租錢一百四十千文總計新舊塗租及奉發關款每年可得八百餘貫歲修經費無慮短絀矣若因風水衝壞勢宜

重造則所入有制而須用不能預定惟有臨時設法辦理而已

新  
增

宋王應麟濟南陳公修東津橋記四明自唐長慶初遷州治於鄆城東門之外瀕江民病涉刺史應彪始建浮橋有虹景見雲表卽其地維舟隨潮汐上下故橋以靈名其長爲丈五十有五廣尋有六尺宋更名橋曰東津屢圯屢修郡乘備焉由長慶癸卯迄今四百六十有九載橋之名雖存舟漏木朽鐵繩斷竹索腐行人肩摩趨葦航以濟迅飈駭浪瞬息淪爲魚糜或省憂濟南陳公

祥咨諏民瘼聞之嗟戚慘怛若已納之溝更舊圖新以身帥之牧守掾屬叶力競助士庶風動不約而從飭材庀工治舟易木鼓鐵爲纜撻竹爲竿規制鞏壯民不知勞昔之畏塗今履康莊波臣受職罔有昏墊漕艦琛舶湊集城下夸麥剗見仁人之利溥哉公猶爲永久之慮擇民戶十有六家蠲徭役科調隸局任橋事未敝而修費約工省不止一時之謀而貽無窮之利仁心遠矣邦人訢訢謂惠行政舉鄭子產有愧焉百世之澤也廼識其事俾後人勿壞



元劉仁本重修靈橋記畧四明環郭皆水自剡源合七十二溪會於奉川又分而錯下其西南北流悉導治爲河獨東匯鄞江以達於海者潮汐吐吞橫互其外郭故往來患涉焉按郡乘唐長慶中刺史應彪度江廣以丈計之五十有五制十六舟舟連負板成橋橋具而虹霓現因名靈橋歷五代及宋屢圯屢建七八月間颶濤作代濟以小航率皆區畫無法國朝至元間憲使陳祥更治之遴編戶蠲徭俾專繕修久則姦起故蠹者利其脫落終歲營造弗就輸役之氓病之至正十二年淮氛浸

擾江浙省平章方公肅廷命統舟師分署鎮鄞鄉父老水濟川獻言於邑丞麻公直曰縣官賦米得三百二十五石配徭戶受作子本計造橋直籍而備之歲歲而葺之事未就緒民罹供億日繁重力不逮今償米直願爲之計丞上其言於省省議矍之遂檄郎中張啓原董治俾丞釐正官出緡錢九百定有奇購材召工倣台郡中津橋制每舟以二爲偶肩連櫛比合爲一扶中實以材凡爲舟一十有八共爲扶偶者九鐵繩貫串紐組岸澚筏纜相維杙榿江底仍籍丁夫二十一人相之於是往

來者履康衢矣既而計餘錢作二航以濟桃花渡之涉  
罄餘錢買田一百五十畝城之士民率助者倍其買數  
又規橋側靈濟廢寺畝一百六十有奇并其基址易構  
爲橋局公廨中建廳事四楹旁列倉庾八楹後爲佛堂  
六楹舉其香燈命僧居之公爲檢籍歲收子粒慎其橐  
鑰專理橋務民弗再勞官無旁出旣落成有衆驩然相  
與來告用書以勸後來者  
明陸瑜浮光陸公修橋記畧正統九年浮光陸公奇初  
以進士授戶部主事卓著聲績大司空薦聞陞知寧波

府下車之初恤民疾苦簡其征徭計修東津靈橋之費  
不可猝就督戶租爲其具於是捐祿入積錙餘同寅相  
謀乃命耆民經始伐大石堞橋首各樹石柱二造排棧  
十有一遣人於錢塘擇木爲舟二十價廉工省數月事  
集每岸維一棧扶一舟餘如故制爲九扶偶肩聯櫛比  
中實巨枋篋纜相維可於深淵旁加欄楯夾貫鐵絙紐  
組石柱鈎圓中縮備開合蟬聯虹跨隨潮汐上下規制  
鞏壯徒御安行又作石亭三楹爲守夫過客寒暑風雨  
之庇以舊廢舟棧價構養濟院房五十七間一舉二成

民不知勞其惠下之仁溥矣邦人訢訢相告願著石章以諭無斃嗚呼創固難其人繼之尤難其人是橋自長慶癸卯迄今正統己巳六百二十八年更守宰不知其幾能以仁民爲心者落落可稱何仁賢之不多得也彼豈無是心哉惟知利己不知恤人苟生幸死甘恥無聞後人迂續斯仁濟民之艱猶己之艱橋之永如此江仁之流如此水矣

明黃潤玉重修浮梁記畧成化改元之明年朝廷舉賢刺郡大理方公來守吾邦時和歲豐百廢具舉乃樽節

甬上水利志

卷六

穴費盡撤東津浮梁腐材重以杉木造二十舟舟各塗首以厭水怪壅堤舟腹以禦水壘方之而構以編棧箱以互闌乃聯之貫鐵練於東西岸之石樞復竅兩石肘岸旁並岸之棧施轉軸貫肘隨潮汐縱縮軒輊之卜吉將比梁郡父老合言於鄞縣尹劉侯昇願紀成績詔告後人余謂東津之東衛司演武場所在浮梁實據一郡要衝凡沿海九衛所守隘十巡司課鹽三十一場八泊七鄉齊民數萬餘家不惟往來人馬輻輳梭緯而郵遞聲息下上文檄晝夜不絕鎮帥所部演武卒伍寒暑不

停是誠一日不可廢浮梁也方舟一被潮颶衝激解去  
必須扁舟橫流渡之人畜雜還常罹覆溺之患今公斯  
舉規制宏大木材堅貞出於前人計慮之表俾守津者  
省繁擾之費渡津者寬覆溺之憂此見公以不忍人之  
心行不忍人之政也用斲石鑄文以告來者公名達字  
景由世家閩之莆田登甲戌進士第

國朝郡守李煦捐修浮橋申詳奉批碑文爲詳明修理  
浮橋等事康熙二十四年正月二十八日奉 巡撫都  
察院趙 批本府申詳竊照郡城靈橋門外逼臨鄞江

山溪奔騰海潮澎湃兩岸懸絕誠天險也南通今  
接定關東抵各鄉鎮輿左界演武教場兵馬稠  
輻輳擊肩摩刻無寧晷若欲壘石爲橋智勇莫  
切望洋之悽倘爾扁舟問渡覆溺頻聞羣駭陽侯  
考唐長慶三年刺史應彪始置巨舟十六蓋板長一  
五丈闊一丈四尺以濟行人方經始時雲中有虹影  
上遂名靈現又名靈建此寧郡東郭之始有浮橋也  
後時葺時圯明季僉報富戶修造誘以冠帶謂之江橋  
大戶膺役者家破民甚苦之

本朝五年一葺俱屬里民捐輸奈經收未得其人縣胥恣肆中飽惟以不堪材料苟且從事搪塞目前踰時卽敗去歲之六月廿八日颶風忽發怒濤崩擊船排颺散盡歸烏有遂致咫尺江干如隔千里本府自愧疎庸臨流興歎不揣綿力獨任重新復念此番動作必倍料加工始得經久適有鄞民王海粟詣府條陳隨加酌量經營僱募夫匠採運桎松杉木購買灰油麻鐵於九月十二日興工至十二月初二日告竣其監督之事卽委王海粟任之果能領畧指畫悉心料理計造甓船一十有

六各長六丈八尺闊一丈四尺船排九方共計三十五丈各闊一丈五尺小排亦一十六方並皆厚板密釘布置牢固左右俱設欄楯樞樞枋皆揀巨木悉以篾筴絞縛互相聯絡包以鐵箍兩旁統貫鐵鍊連環無間復加粗大篾纜一十四條小纜三十二條分若蝦鬚中繫橋之腰排碇岸之四角縱遇狂風巨浪亦堪中流砥柱是役也夫匠按日給銀料物照價平買動費咸出已資絲毫不擾民力但查往例浮橋內外不許灣泊船隻恐衝撞易朽勒禁尙存今則姦牙覓利移埠橋前大小舟楫盡

傍橋側相應仍請勒石以垂久遠則民之永得利涉擬合詳報等因奉批據詳復造浮橋不擾民力咸出已資殊可嘉尚其灣泊船隻如詳嚴行禁止仍勒石永遵繳康熙二十四年八月日立

國朝觀察李可瓊重修浮橋記四明東郭外之有浮橋由來舊矣昔唐刺史應彪度江之尋丈用十六舟肩連櫛比上架木板紐以鐵索維以竹纜持以巨木兩旁各設欄楯以護行人民於是利濟焉五代以來屢敝屢修雖舟之增損不一大抵不離乎舊規也我

朝順治間重爲修造至康熙二十六年遇颶風漂壞因改造之乾隆三十五年復改造之要皆官輸不足取資於民而後集事迄今五十餘年矣此卽風日不及雨露不零亦難免於朽壤而況地處海防關要人馬絡繹商賈輻輳又兼潮汐上下簸揚磨擊剝損尤易行人惴惴如履薄冰焉予竊憂之先後籌於默園詠之兩郡守丹山雲木兩縣令俱謂此刻不容緩之事共捐廉爲倡勸民捐輸民亦樂助而紳士徐桂林竟慷慨捐錢千緡李權不惟勸事任勞並捐錢百二十緡尤足嘉尚計橋之

成共需錢六千三百緡有奇以原橋之舊材售錢三百八十緡益以預備橋工之本年新舊塗租錢六百六十緡餘皆捐輸之所集事也可不謂勇於爲義者乎於是亦爲舟十有六大小相參而材木加厚焉爲鐵索二各長四十五丈而煨煉加熟焉爲大椶繩二以代竹纜爲大排木九以易木板而各排之下用大木十一株擊之排木空縫又用小木八排以平之兩旁仍設欄楯以爲護衛橋之沿岸築石砌以防激橋之東西特建兩坊以爲表識五月鳩工九月告竣內既堅固外亦壯觀藉

非理事者位置得宜督率勿懈焉能如是速成哉顧橋旣成矣歲修亦不可不預籌也往者僅藉關欸銀八十餘兩西岸塗租錢二百緡歲爲修補而已今東岸居民亦願效西岸歲出錢二百緡又歲益烏豐隙地承租錢二百緡視曩者歲修之費不僅倍之議以曩所備者仍爲歲修以續所備者積至二年一大修今而後民可無病涉矣爰爲之記

元貞橋 縣西南五十里元貞元年里人王子明建古  
有盛家渡元貞時置橋一名盛家渡橋

敬止

南達奉化

縣境北達小溪

志

百梁橋 縣西南六十里南達甘嶺北達小溪寶慶志作小溪江橋宋元豐元年建長二十八丈闊二丈四尺而爲屋於其上計二十二楹七洞每洞十四梁中洞十六梁建炎兵燬紹興十五年邑人朱世彌世則紹祖父功重建元至正甲辰重修明隆慶庚午燬於火次年重建萬歷三十八年橋屋頽里人馬一中李子高請之知府戴新僉報良民十四名重修

敬止錄

宋唐昌言重建百梁橋記畧四明山占鄞之句章岡嶺

甬上水利志

卷六

夫

重複崒嶽連空盤紆深險壤接會稽泉源所自出也千巖萬壑晝夜爭流東注滯怒勢擊雷霆唐縣令王侯卽山之麓疊石以障水勢號它山堰其水旱則三分入江七分入河潦則反是自堰距江綿數里南列市廛北立官鎮居多衣冠族人物繁庶乃邑之一輿區也山水暴漲江濤怒浪舟楫難濟熙寧中里人朱文偉慨然以爲利涉大川必假橋梁於是捐已帑以經營之壘石固隄跨以虹梁覆以華屋惜工未竟而沒焉其子學錄公用謚克紹前功歷數載始成往來之人莫不德之建炎初



胡馬長驅燬於兵火越年久官私睥睨而不敢舉以事  
重而費不貲也汴陽高公龍圖來宰斯邑下車之初勤  
恤民隱究諸利病嘗歎是橋實爲要津若廢而不葺其  
如前人之功利何重慮勞民未輕興舉乃見鄉之耆老  
必勉爲之倡偉之孫世彌世則孝友篤學懷才抱志乃  
相謂曰我祖我父首創此橋今罹煨燼每一見之輒爲  
痛心矧重煩邑大夫之激勸其容已乎於是銳然鳩工  
度材一新舊制採山植柱作砥中流設以巨板縱長二  
百八十丈橫廣二十四丈覆屋二十有二楹費約二十

餘萬緡以紹興十有五年乙丑仲秋經始越季冬落成  
嗟夫父作家室厥子猶有弗肯堂構者又况祖父之建  
立初非一身一家之利孰肯繼述於既廢之後乎亦可  
見仁人孝子之用心矣然非賢邑令愷悌結人安能役  
民動衆使朱氏兄弟傾囊倒廩以專任其責哉斯民惟  
恐高公指日踐揚清要以失此遺愛爰欲擬像貌公立  
祠於亭朝夕瞻拜庶使百里之民歌甘棠如曩日公聞  
而力拒之輿情終未已也昔子產乘輿濟人孟子譏其  
惠而不知爲政政則是橋之成非特朱氏不忘祖德抑

亦樂只君子得爲政之先務也鎮官趙公權酷之暇竭  
蹶從事宣力居多知所贊猷其宅心亦可尚已鄉之耆  
彥史樓諸君屬昌言紀其盛績余聞而喜其累世之惠  
於人也故據其實而稱其相繼之休云

鄞江橋

縣西南六十里南達木坑北通建輿

聞志

一名

大德宋元豐間建屢圯屢修至

國朝道光十三年知縣周名棠督率里紳朱孝銓等募

捐重建

新

國朝郡守葉申薌重建鄞江橋記鄞江源出四明山東

南奉化西北慈谿二江合流於鄞古所稱三江口也跨  
江之橋凡五而鄞江橋實當其衝利溥而形險創艱而  
敗易自道光七年盛諤王汝霖等請於前邑侯程以重  
建通詳未遑經始周侯來尹斯邑乘凋劫之餘甫下車  
卽屢屢以它山洪水鄞橋三政爲急橋尤先務相時授  
規閱四月工竣凡石之召潰者木之摧朽者屋舍之傾  
隆崩漏者咸鳩材選良視昔加緻焉嗟乎橋之建在元  
豐間元明以來屢有興替今圯二十餘年矣謀七年而  
未集一旦安享其成始歎周侯之感孚於民者捷鄞人

之篤於好義用力巨而爲功速也夫捍患濟衆謂之惠此數世之利也乃相與勒石紀述用告後之人俾勿壞橋亘三十八丈橫經三文橋上覆屋二十八間歲收租息以貯經費著爲令經始於道光十四年正月間斷手於四月糜金錢六千貫有奇周侯名召棠雲南人國朝邑令周召棠鄞江橋記鄞江橋一名大德橋北通建輿南達木坑爲四明之鎖鑰凡由紹而寧而台之入山者咸取道於此橋橋建於宋元豐間歷代屢興屢廢其地上承它水下接鄞江溪流奔注風波激沖故木易

朽而石易泐迄今久未修治里人僅於敗礎之上駕木以渡行旅病之道光七年間生員盛諤王祖禹等先後以修復它堰洪塘及此橋三事爲請前令程勘度詳捐蹉跎未舉余於十三年秋承乏來此閱案親勘知三者均宜葺治而先務之急當自橋始遂陳之當道延遼陽刺史胡公枚議定章程里紳朱君孝銓等勸捐蒞事衆心允愜咸樂輸將出入惟平公私不擾閱十旬而告成事速而工固往來者胥歌頌歸功於余予惟除道成梁有司者之責也何足以言功所賴吾士民不吝財不惜

力以數十年之病涉一旦而履若康莊義舉爲不可沒耳至於它堰洪塘尤關西南七鄉水利亦不可視爲緩圖尚望合邑賢紳士共興舉之庶與此橋大德之名並垂不朽焉爾其橋屋租息貯充歲修之費立殷實董事十二人輪流經理并酌定禁約事宜以俾永守凡率公錢者書姓氏於碑陰若夫橋之修廣及工程錢數已詳於葉郡守記中不復贅及也

陳婆渡橋 南達姜山北達小溪聞志

江塘

甬上水利志 卷六

三

甬東南土塘 長二千九百十二丈闊一丈甬東一二

三四畝合管錢志

甬東北土塘 長二千三百六十一丈闊八尺甬東八

九畝合管錢志

萬金土塘 長六千五百十三丈闊八尺十九都二十

都合管以上三塘俱乾隆十六年浙東大禱大憲奏請行以工代賑之法將境內應工修程發帑修築令饑民就食赴工知縣宋鑒因請修築江塘考舊志載江塘有二一在老界鄉甬東隅一在鄞塘鄉二十八都今東隅

既有南北塘而萬金塘近接大教場亦係舊塘因請帑大修特有萬金之名是現有三塘與舊志未合至鄞塘鄉爲姜山一帶亦屬沿江蓋另有土塘也錢志陳家洋石塘 桃花渡東北沿江十里與鎮海縣接界名陳家洋舊爲土塘明成化五年改爲石塘高五丈長二千一百餘丈橫倍其高加三之二新增明洪常記畧東出寧波城由桃花渡沿江東北行十里其地屬鄞紆曲盤迴與定海界接名陳家洋舊築土以爲塘塘之上爲驛路凡往來海隅者咸道焉洋距定海

港不五十里而近港之外卽大海其潮汐之盈縮至於是必奔放衝突塘遂日以傾潰居民歲殫力與抗卒莫能勝故其爲路齧蝕而僅存者廣不盈四三尺斷續崎嶇兀然窪然不惟人病於進趨而鄰並之田亦就見削當夫風雨晦冥之時能無顛躓而負泥淖者寡矣況爲患愈久爲力愈難將或至於汎濫而莫之禦也浙江按察副使朱公奉璽書督海道按部過此惻然興念於是咨諏鄉老設法措置市材庀工不擾而集植杙爲址疊石爲岸甃以實虛灰以固甃復布石於土旣平且正實

堅而好途人無虞田者可稼作始於成化五年十月訖  
工於七年三月塘高五丈長二千一百餘丈橫倍其高  
加三之二凡用木石以枚數之一萬一千八百有奇灰  
甃之費惟宜惟稱民之輸力如子趨事矜勞戒亟工用  
樂成夫水土之患厲民禹能平之萬世永賴今公以廉  
慎公勤受安邊之重寄能體國家愛養元元之心於所  
職之餘力舉是役以利悠久視禹之績雖有小大然其  
畏天命而憫人窮蓋等也紀之以示將來

梅墟石塘 明天順間方伯錢璉創議易土以石萬歷

九年工竣長二百八十丈闊一丈二尺

國朝乾隆二年重修嗣後遇有傾圮東鄉食利之畝分  
段捐修塘上立有石碑刻明畝分以爲標識道光四年塘

內添設備塘面廣以三丈二尺爲度二十四年又修

新  
增

明范欽重修梅墟塘記環鄞東三十里而遙有墟焉漢  
南昌尉梅福所棲遲也因名梅墟江闊灘橫急流奔湧  
萬頃田無籽粒廬舍皆爲魚游又名曰茅洋天順間先  
正方伯錢公璉捐資創議塘亦稍稍就緒焉歲久而圯  
則潰決歛陷其在今也爲尤棘維時萬歷九年憲副馮

公時雨大尹楊公芳得庠生錢子江方伯錢公之後裔也偕戚子楠陳時政知茲塘爲利甚薄也而否則其害亦相當也期獲任事者而難其人則有若邑簿孫公春芳廉潔士也蓋亦有幹力膽智焉乃下令申誌之孫公慈恣篤肫其於撫字天性也矧關民生利病若茲塘者乎乃度土鳩工而歎曰惟海憲惟邑侯所以付任予者庶其在此予不能事事其何以奏厥功承乃寵命於是乎稱畚鍤程土物畧基址量日命工不愆於素凡閱月而告成焉其功最鉅亦最險嗟乎秦鑿涇渠關中沃野

漳水既決安邑稱饒雖利有大小其於惠民一也孫公德澤其在人心乎凡此三縣七鄉與尸而祝之社而稷之公今去矣歌咏不忘僉曰猶望孫公也庶撫我乎公之功卓哉其可歌也已不寧唯是恪共正守則賢明決庶獄則賢練達時務則賢平易近民則賢理繁治劇則賢而又仁心自然不爲矯激清白之操淬勵不易所謂古之循良者非耶區區興一利澤一方曾不足爲公重且公與予有舊好也習知其爲人因述其顯末書於石庶永永有垂來世繼軌賢尹周公基繩引不替克綏東

土塘之上緒茅爲菴命菴僧圓琮恪共其事仍撥閒曠塗蕩令其開墾成熟將所花利贍其時常修補之費永垂不朽云爾遂附其名於此

國朝邑令楊國翰增修梅墟石塘記鄞於寧爲澤國枕江抱湖東西十四鄉公私田幾十萬頃所資以潴蓄灌溉者全恃隄防要害失時不修爲患滋大癸未冬余權掾茲邑於水利橋梁碶閘壩漸修以次郭東三十里有塘名梅墟者舊矣明成化間先正錢方伯璉創議易土以石蓄淡禦鹹以二百八十餘丈之塘堤衛一百七

畝之田舍厥後計畝出資以時修補具載於石甚善舉也乾隆二年又經邑廩生陸君用拯等重修歲久傾圯民多觀望迄道光三年七遇風潮坍塌亟矣紳耆錢鏗錢澇陳林錢世德等合詞而進曰我侯之至百弛具張矧茲要害敢請隄防余過往周視或圯或圮畧無完固民或惜費憚勞權議擇急小修非善之善也遂進父老告之曰不一勞者不永逸不暫費者不久安斯塘爲鄞鎮兩邑之衝水陸孔道江闊灘橫急流奔湧非全行固築添設備塘不足以垂久遠今爲吾民計其坍塌已甚



若某罾至某罾者則重築宜其傾圮不固若某罾至某罾者則增修宜粟塗泥以爲址鑿巨塊以爲身祇蓋石以爲平面廣度以丈四尺址廣度以丈八尺而隄內復設備塘其面較廣蓋三丈二尺爲度分段修築不愆於累尅日計工毋怠厥成於是民咸悅從踴躍捐資若趨家事閱七月告成余復詣驗工堅料實東西行過是鄉者舉謂自茲以往淡不洩鹹不蓄禾稼豐熟道路坦平永有石塘之利矣侯之得圉我民豈止是哉未幾余以例調去士民願大吏乞畱不獲請書增修之故於石俾

後之人無替前修有以久捍防之利於無窮余嘉諸紳耆之任勞任怨相與以有成也是以記

泗洲塘 長十七丈闊一丈在四十三都三罾

錢志

洋河石塘 縣南二十五里外江內河中限以塘

開長志

五十丈闊一丈五尺在四十二都一罾

錢志

狗頸塘 卽南塘以形得名亦名九經塘在長春門外

二十五里外受江湖之衝內障大川之流洪水時至則塘岸易決江與河合而西南諸鄉皆受害矣康熙十年縣令朱士傑鳩工修理先設東西兩備塘以遏上下之

流然後加工修築經年工成乾隆二十五年知縣高大澤重修嘉慶十一年塘復壞知縣周鎬會同紳士公議將已坍之塘并河俱議出以免南來水直射衝激另買沿河一帶民田爲塘修築堅固改名永鎮四十二都一二三畝合管參李忠錢志及四明談助國朝邑令周鎬重築永鎮塘記鄞澤國也潮江貫其中分東西兩戒潮水鹹不利灌溉必取資於山泉地勢中高外卑一瀉立罄故鄞之言水利者堤防之力居多其在東七鄉以東錢湖爲本在西七鄉以它山堰爲本然

東錢湖四面環山於峽口設碾節宜旱閉澇洩一硤夫足以司之它山堰發源四明下至西壩綿亘百餘里大約與江爲鄰蓄澹禦鹹惟塘是賴而永鎮塘尤其單弱衝要處也塘在長春門外二十五里舊名狗頸塘蓋以形得名其地外江內河兩面壘削對岸沙塗凸出潮水漲落逼衝於塘以故屢築屢倒康熙十年前令鳩工修理特設東西兩脩塘以遏上下之流河流中斷而正塘傾決如故自是歲修不嘗因或有不意嘉慶八年冬余以常山令攝篆鄞邑東鄉士民即以東錢湖爲請余爲稽

考舊章嚴硜夫私洩之禁而湖水以治唯狗頸塘則任其廢壞無一人請治之者詢之士人僉曰此塘有妖前縣歷歲蠲修民力大困而迄無成功是以動色相戒莫敢再議余俟潮落時細審形勢並其傾圮之狀曰得之矣五行惟土制水今植丈尺之木於深淵而戴之以石上實下虛潮汐震撼其傾陷也固宜茲維大反所爲就其傾陷之處填以亂石石與水平然後加土其上復以巨石甃其兩旁則土石勝而水氣自殺且塘基狹不能持久若將斷河盡實以俾與塘鏘成一片則土力愈厚

潮雖悍無能爲也僉曰善惟古河閉截終以爲憾且取土匪易請於斷河北岸買田鑿河卽以鑿出之泥填入廢港則施工易而河道亦通余韙其言顧經費浩大乃集西鄉紳士郁鼎和趙東臺陳墨林等廣爲勸輸督工庀材各任厥職經始於十一年九月二十六日閱五月告成計築新塘九十二丈一尺二寸闊十丈開鑿新河九十七丈闊五丈有奇又修築老塘八十五丈闊三丈七尺計費緡錢三千八百餘貫皆民力也既成諸紳士復前請曰是塘爲患七百年今而後庶與東錢湖並

治唯是地處曠野四無居民脫有滲漏誰其省視且恐鄉愚之利吾石而竊取之也願加捐千金構屋數楹以備居守卽以塘之餘地十畝零任墾植以酬其勞而前買糧田鑿河亦可如數抵補無闕余喜士民之助余有成而更綢繆以善其後也用鐫碑以記巔末其捐數詳書於扁並垂不朽原名不雅馴易之曰永鎮志祝也

風棚石塘 在四十二都二畝長六十丈闊一丈五尺案聞志載北渡風棚廟之前有廟前塘明萬歷間司李魏復琦修築故亦名魏公塘計長百餘丈大約礮廢而

改修爲塘丈尺則至今更減耳

錢志

沈公石塘 縣南二十六里洋河塘之南約長十丈與

狗頸塘相鄰萬歷中知縣沈猶龍所築也塘之旁向有

沈公橋橋之內又有水漕橋下通大河之流以灌田漕

之迂迴盡處有沈公外塘不與河通田甚病焉外塘旣

不修則潮易衝入仍當於舊橋下開一穴如舊制至外

塘偏僻官府勘視往往不到每爲偷於修築者所朦不

可不察也

聞志

長六丈闊一丈五尺在四十二都三畝

錢志

長堰塘 長十八丈闊一丈三尺在四十一都一畝與

二三箇合管案舊志有長堰在縣西南三十五里疑卽

此錢志

楊木塘 長一丈闊八尺在四十一都三箇志

萬上塘 長三丈闊一丈在四十一都三箇志

柳橫塘 卽西壩石塘明正統間知府鄭珞因歲久塗

漲移壩置於浦口兩岸鑿石爲塘長三十二丈闊一丈

植柳其上以便往來民稱鄭公塘曰柳橫塘錢志乾隆五

十三年知縣錢維喬於塘南之洞橋建石鋪一座以資

蓄堵新志

甬上水利志 卷六

新舊堰壩

倪家堰 縣城東半里至正續志在老界鄉聞志今廢

林家堰 縣東五里年久罅漏不足爲江湖蔽障每巨

濤澎湃則斥鹵漫淫積滯久之則滲洩於外不獨爲民

畝害抑亦不利舟楫判府吳潛因民之請以石更之塘

高濬深視舊址舒長添斲石礮修葺葺車屋補築土塘自

是民田有灌溉之益舟楫無險阻之虞至正續志今廢

石軍堰 長三十丈闊七尺五寸在一都四箇案曹志

有石家車堰縣東五里又名舊軍堰當卽是此錢志

過堰 長七丈五尺濶六尺在二都一畝錢志

黃墅堰 縣東五里訛呼黃市堰成化志李志作王駐洋

堰錢志在老界鄉聞志

徐師堰 縣東三十里成化志在老界鄉聞志

張家堰 縣東三十里舊名楮浦成化志在老界鄉聞志

阮家堰 縣東三十里舊名余家成化志在陽堂鄉聞志

梅墟堰 縣東北三十里老界鄉聞志以上五堰俱廢

道士堰 縣東南五里老界鄉舊名林家堰與鄞江右

鄭郎堰相對李志作林郎壩長二丈闊一丈六尺二十

甬上水利志 卷六

都一畝與十九都合管參聞志錢志

周宿渡堰 卽曹志渡頭堰長二十五丈闊七尺乾隆

二十三年改建石塘長二十八丈闊一丈三尺在二十

都一畝錢志

大漲堰 長八尺闊六尺在二十都一畝錢志

小漲堰 長十四丈闊五尺在二十都一畝錢志

十河堰 長一丈闊六尺在二十都一畝錢志

胡家堰 長十四丈闊四尺在十都二畝錢志

顧家堰 長二十三丈闊四尺在二十都二畝錢志

雪家堰 疑應作薛家堰長三十一丈闊五尺在二十

都三畝 錢志

小堰 長五丈闊五尺在二十都三畝 錢志

衝江堰 長十一丈濶五尺在二十都四畝

銅盆浦堰 土人名為徐更樓堰堰內即往姜山河止 敬

錄長六丈闊五尺在二十都四畝 錢志

李師堰 長三丈闊五尺在二十都四畝 錢志

廟前堰 長一丈六尺闊五尺在二十都四畝 錢志

蕭王堰 長十丈闊六尺在二十都四畝 錢志

甬上水利志 卷六

毛家堰 長二丈闊五尺在二十都四畝 錢志

王家堰 長三丈闊五尺在二十都四畝 錢志

青整堰 長五丈闊五尺在二十都四畝 錢志

余家堰 長四丈闊八尺在二十一都一畝 錢志

菴前堰 長四丈闊八尺在二十一都一畝 錢志

大慈堰 長五丈闊一丈在二十一都一畝 錢志

陳婆渡堰 長五丈闊五尺在二十一都一畝 錢志

桃枝堰 長十五丈闊三丈在二十一都二畝與三畝

合管 錢志

傅家堰 長二丈九尺闊八尺在二十一都二箇錢志

後堰 長六丈五尺闊八尺在二十一都二箇錢志

黃冲堰 長五丈闊一丈在二十一都三箇錢志

王小水堰 長八丈闊七尺在二十一都四箇錢志

花山堰 長一丈五尺闊七尺在二十一都四箇案舊

志有大花山堰小花山堰俱在手界鄉今僅存其一錢志

臨江堰 縣東南三十里手界鄉聞今廢志

鍾家堰施婆堰 俱縣東南三十一里手界鄉聞今廢志

戴蔣堰古塘堰 俱縣東南四十里豐樂鄉聞今廢志

甬上水利志 卷六

前堰 長四丈三尺闊六尺二十一都四箇錢志

後堰 長二丈五尺闊八尺二十一都四箇錢志

寺後堰 長二丈闊一丈二十一都五箇錢志

上河堰下河堰 在縣南三十五里乃鄞塘鄉姜山之

前上下河之隄也上河則白杜橫溪山源注之與東錢

湖水通下河則銅盆浦有堰常浦進林有堰通奉化江

潮雨澇則江湖接之二河漲水相迎故堰善崩行者居

者皆謂二堰各遷十餘丈則依山之麓易於隄防且得

白杜橫溪之源回環舊河中可溉田五六百畝而得常



稔亦無妨他鄉水利實慶志今廢聞志

繆家堰 長十四丈闊七尺二十八都一畓與九畓合

管錢志

鄭家堰 一名程家堰長六丈闊九尺在二十八都二

畓錢志

王家堰 長五丈闊二丈在二十八都三畓錢志

周家堰 長十丈闊八尺在二十八都四畓錢志

劉家堰 舊志有樓家堰疑卽此長七丈闊一丈在二

十八都四畓錢志

甬上水利志 卷六

宋家堰 長二十八丈闊七尺在二十八都五畓錢志

陸家堰 長二十六丈五尺闊一丈八尺在二十八都

六畓錢志

徐更樓堰 長七丈四尺闊一丈九尺在二十八都六

畓與三十都一畓合管錢志

干婆堰 一名王婆堰長十二丈闊七尺在二十八都

七畓錢志

徐家堰 長十二丈闊七丈在二十八都八畓錢志

東里堰 長十丈闊九尺在二十八都九畓錢志

小黃土堰 長九丈闊七尺在二十八都十畝錢志

長塘堰 縣南二十五里鄞塘鄉江河夾岸為塘延袤

百餘丈俗呼百丈堰當風潮之衝禦河流之洄累築累

敗役戶坐是蕩產者衆里士黃堂相地勢謂河洄本以

漑塘下之田然不可與水爭地乃以田易鄧橋廣福寺

田鑿渠環之以接舊河之洄使仍可漑塘下之田更於

河洄鄰江之地各捐半里許於其外為一堰以殺水勢

舊塘遂堅壯民病始蘇寶慶志

茅家堰 長五丈五尺闊四尺在二十九都一畝錢志

甬上水利志 卷六

顧家堰 長五丈五尺闊三丈二尺在二十九都二畝錢志

後墻衙堰 長二丈闊六尺在二十一都五畝錢志

花衙堰 長三丈闊六尺在二十一都五畝錢志

陸家堰 長一丈五尺闊五尺在二十二都一畝案陸

家堰今有二查聞志僅載一堰在縣東南三十里此為

近之錢志

寺後堰 長五尺闊八尺在二十二都一畝錢志

泗洲堰 長四丈闊四尺在二十二都一畝錢志

范家湫堰 長三丈闊五尺在二十六都一畝乾隆五

十二年居民具呈改建石碶錢志

紫金堰 長三丈二尺闊六尺在二十六都二畝錢志

徐繩桶堰 長一丈九尺闊七尺在二十六都三畝錢志

前百丈堰 長六丈四尺闊八尺在二十七都一畝與

二三四五畝合管錢志

後百丈堰 長五丈闊八尺在二十七都六畝與七八

九畝合管錢志

傅家堰 長七丈闊五尺在二十八都一畝錢志

甬上水利志 卷六

鮑家堰 長五丈闊四丈在二十九都四畝錢志

聞家堰 長五丈闊三丈在二十九都六畝錢志

斜橋堰 長十丈闊三尺在三十都一畝錢志

上蔣堰 長十二丈闊三尺在三十都一畝錢志

下蔣堰 長十丈闊三尺在三十都一畝錢志

鷺頸堰 長十丈闊五尺在三十都二畝錢志

張家堰 長十丈闊五尺在三十都二畝錢志

茅家堰 長二十丈闊五尺在三十都三畝錢志

長春堰 長三十丈闊五尺在三十都三畝錢志

開頭堰 長十丈闊五尺在三十都三畝錢志

施家浦堰 長八丈闊五尺在三十都三畝錢志

杜家堰 聞志作屠家堰長二丈闊三尺在三十都四畝

畝錢志

下梁堰 長十丈四尺闊三尺在三十都四畝錢志

任家堰 長二丈闊三尺在三十都四畝錢志

葛家堰 長六丈闊四尺在三十都五畝今改石礮名

豐樂錢志

蟛蜞堰 長三丈闊四尺在三十都五畝錢志

甬上水利志 卷六

吳

周思堰 長四丈闊五尺在三十都六畝錢志

蔦蘆堰 長五丈闊一丈在三十都一畝錢志

蝦泥堰 長八尺闊七尺在三十都一畝案聞志載

花堰又名蝦堰在縣西四十里鄞塘鄉核之道里疑卽

此錢志

南河堰 長一丈闊五尺在三十都四畝錢志

以上堰凡九十並傍鄞江之左

鄭郎壩 長三丈濶一丈七尺在城西隅二畝案聞志

舊名鄭郎堰蓋初係土堰後改爲石壩也錢志至正續志

作鄭十八郎堰新

鄭家食利堰 城南門外與鄭十八郎堰並列至正續志

瓦窰堰 縣南三里聞志

新朱瀨堰 長五丈闊一丈在五十一都一二畝合管

錢志

老朱瀨堰 長八丈闊二丈六尺在五十一都三畝錢志

小漲堰 長十五丈闊八丈五尺在五十一都四畝錢志

段塘堰 縣西南十里清道鄉聞志

張家堰 長十二丈闊四尺在四十三都二畝與三畝

甬上水利志 卷六

七

合管錢志 至正續志又有張家小堰近徐家堰新

翁家堰 長十五丈闊一丈在四十三都一畝錢志

華家堰 長七丈闊一丈在四十三都一畝錢志

范家堰 屠氏橋間裏近江際敬止錄 長三十六丈闊一

丈在四十三都一畝錢志

寺莊堰 長九丈闊五尺在四十三都二畝錢志

王師堰 長七丈闊四尺在四十三都二畝錢志

桑塘堰 長十五丈闊七尺在四十都二畝今分大小

為二道錢志

下陳堰 長十八丈闊二丈在四十三都三畝錢志

松樹浦堰 縣南十里清道鄉上有強堰下有小閘通

江今淤敬止錄

王家堰 近松樹浦敬止錄

盧峯石堰 長五丈闊一丈在四十三都三畝錢志

大蘇堰 行春碶下成化志

蔣家堰 行春碶南成化志

鑪頭堰 近蔣家堰過江即銅盆浦海防考云明永樂

二年命太監鄭和統督樓船水軍十萬招諭海外諸番

甬上水利志 卷六

三

日本首先納款擒獻犯邊倭酋二十餘人即治以彼國之法盡蒸殺之時銅甌猶存鑪竈遺址在鑪頭堰聞志

小沔堰 近鑪頭堰成化志

邢家堰 西南二十里俗訛凌家成化志

陳五耆堰 縣西南二十里近娜兒渡成化志

黃家藕池堰 縣西南二十二里成化志

祈湖堰 縣西南二十二里光同鄉聞志

樓家堰 縣西南二十二里光同鄉聞志

徐家堰 縣西南二十三里光同鄉聞志

蔦蘆堰 長五十二丈闊一丈在四十三都四畝案三

十二都有蔦蘆堰在鄞塘鄉之蔦蘆故名此堰在樸社

亦名蔦蘆或曰烏坵未審所自錢志

凌洋堰 長十二丈闊一丈在四十三都四畝錢志

北渡堰 縣西南三十里成化志舊名常浦礮錄今係

石壩長三丈闊一丈六尺額設壩夫三名每名工食纜索銀五兩在四十

二都一畝錢志

何家小堰 縣西南三十里成化志

朱家堰 近風棚廟敬止錄

甬上水利志 卷六

堯

沈家堰 近顏家橋敬止錄

石堰 縣西南三十五里成化志

范家塘堰 縣西南三十五里謝家境又名播木堰成化志

志

黃家堰 縣西南四十里句章成化志

仲夏堰 縣西南四十里唐太和元年刺史于季友於

四明山下開鑿河渠引山水流入諸港置堰蓄之溉田

數千頃後因別置它山堰疏而為河此廢不用聞志

崔家堰 縣西二里聞志

和尙堰 縣西五里聞志

朱將軍堰 縣西二十五里聞志

唐家石堰 長三丈三尺闊一丈一尺在鎮都二畝錢志

北郭堰 長一丈六尺闊一丈三尺在城西隅九畝錢志

案北郭堰諸志俱不載及閱宋志北門舊名鄭堰門知

堰之由來久矣其制砌石為之高與路平永固如斯不

致崩塌洩水四明談助

北津堰 縣西北二里又名北清蓄水以通城下濠池

今湮敬止錄

甬上水利志

卷六

旱

倪家上下堰 各長六十五丈闊二丈在五十都一畝

錢志

葉家堰 長十丈五尺闊一丈在五十都二畝乾隆五

十二年居民呈請於沾利田畝捐資建復未及舉行錢志

吳家堰 長二丈五尺濶一丈在五十都三畝錢志

方家堰 長二丈濶一丈二尺在五十都三畝錢志

金仙廟堰 舊名集神堰長八丈二尺濶一丈六尺在

五十都三畝錢志

王家堰 長十五丈濶二丈二尺在五十都五畝錢志



西渡壩 縣西北二十五里歲久塗漲明正統間知府

鄭珞移置浦口兩岸甃石為塘成化志今名西壩長四丈

闊二尺額設壩夫十名每名工食纜索銀九兩二錢在四十九都二錢志

金家堰 長六丈闊六尺在四十九都二錢志

王野堰 長五丈闊四尺在四十九都二錢志

大堰斗堰 長十一丈闊七尺在四十九都二錢志

橫河堰 長八丈闊六尺在四十九都三錢志

馬郎堰 長三丈闊六尺在四十九都四錢志

邵家堰 長五丈闊一丈三尺在四十九都四錢志原

甬上水利志 卷六

里

名遠江堰今訛又名顧家堰新志

後浦堰 長三丈闊五尺在四十九都四錢志

包家堰 長十三丈闊五尺在四十九都六錢志

黃婆堰 長九丈闊八尺在四十九都六錢志

以上壩二堰凡五十九並傍鄞江之西

鄞童堰 縣西南二十里聞志

蘭浦堰 小溪鎮洞橋側政止錄縣西南四十五里聞志

杉木堰 縣西南五十六里舊為泥堰溝引江潮入河

漑田數十頃惟潮湧則行人不便明弘治初為石堰塞

其溝路水利不通行者便而農甚病謂宜易之以礮開  
而上跨以橋度得兩便開志

禪巖堰 在杉木堰之上通清源之水由懸磁入江敬止

縣西南六十里聞志

西高堰 縣西南六十一里聞志

大皎堰 縣西南七十里聞志

以上六堰俱在句章鄉並由它山堰水所從出之  
處置之

### 慈谿江

## 甬上水利志 卷六

里

源出紹興餘姚之太平山至丈亭歧而為二一貫邑中  
一環邑外其西北諸山之水未至縣五里滙於彭山堰  
有斗門以洩於江二江皆東來至西渡復合以歷郡城  
北至郡城東北會鄞江為三江口宋吳潛因於合處堰  
其貫邑中者名小西壩敬止錄

### 奉化江

源於鎮亭山出縣之惠政橋下與諸溪水會而南來至  
三港口與鄞江自小溪出者合而亘郡城之東敬止錄

